



Rabu, 15 Nopember 2023

**Ogen: Lukas 1:36**



**Erkade Kade Ras Maria**



**K**ade-kade e situhuna pemere Dibata si mbelin man banta. Kade-kade e me si numpak-numpak kita, ia me temannta arih i bas ndalani kegeluhen. Erbage situasi si man bentasen, subuk bas meriah ukur bage pe erndeale ate. Kade-kade e me inganta nuri-nuri bas kerina situasi e. adi biaknan si man sampaten, kade-kade e nge lebe si nampati, adi biakna mpetunggungen, kade-kade e nge leben si mpetunggungen kita. Si ugapana pe kecibalta, kade-kade e ngasup ngalonalosa. Megati lit belas-belas i bas kade-kade e nari; 'uga bahan bage ngenca kede-kadenta.' Ertina ugapa pe kita, ialonalona, bas la payo e pe kita tetap iakuina kita kade-kadena. Si idah Elisabet erkade-kade ras Maria. Tupung Maria reh ku rumahna, minter ialonalona. Nuri-nuri Maria man bana idengkehkenna alu dem keleng ate. Situasi Maria natang tuah lenga erjabu, e situhuna aib man keluarga, tapi Elisabet ngasup ngalonalosa. La itembehina Maria, la iperimbangna. Alu dem keleng ate ialokenna Maria uga litna. Itumpak-tumpakna Maria alu mereken tumpangan i rumahna. Ipetetapna ukur Maria, gelah ula lalap erndeale ate, uga erbahan meriah ukur Maria bage ibahanna. Bagem adi erkade-kade, katawari e pe sikap ngalonaloka kade-kadena. Ia mpesikap keluargana gelah la juru i lebelebe jelma si enterem. Uga maka malem ate kade-kadena em jadi perjuangenna. Jadi persinget kal man banta, uga sedekah enda kita erkade-kade? Enggo nge sialo-alo kade kadenta i bas lit kekurangenna? Entah tupung sikap geluhna maka meriah si akap erkade-kade ras ia. Tupung geluhna man rananken, mela kita ngakui ia kade-kadenta. Perbahanen Elisabet man kade-kadena, jadi pelajaran man banta, guna ngalonaloka kade-kadenta bas kekurangenna, si pehaga i bas ia la beluh encibalken lagu si mehuli. Si tumpak-tumpak dengen sisampati gelah ia la juru. Perbahanen sibage me si ngena ate Tuhan.